

U skladu sa Zakonom o udruženjima i fondacijama (Službene novine Federacije BiH br.46/02), Osnivačka skupština Udruženja/Udruge pedagoga tehničke kulture u Srednjobosanskom kantonu/Županiji Središnja Bosna, u Travniku 13.12.2003. godine donosi

S T A T U T

UDRUŽENJA/UDRUGE PEDAGOGA TEHNIČKE KULTURE U SREDNJOBOSANSKOM KANTONU/ŽUPANIJI SREDIŠNJA BOSNA

I OPĆE ODREDBE

Čl. 1

Udruženje/Udruga pedagoga tehničke kulture u Srednjobosanskom kantonu/Županiji Središnja Bosna je odgojno-obrazovno Udruženje/Udruga koje se bavi razvojem i unapređivanjem tehničke kulture i naučno-tehničkog stvaralaštva.

Udruženje/Udruga je asocijacija dobrovoljno udruženih klubova , aktiva, udruga, podružnica i drugih oblika organiziranja nastavnika tehničkog odgoja u općinama Srednjobosanskog kantona kao i pojedinaca - nastavnika tehničkog odgoja i mentora u klubovima mladih tehničara koji prihvataju ovaj statut.

Udruženje/Udruga je nepolitičko, nestranačko i neprofitno Udruženje/Udruga.

Udruženje/Udruga se može udruživati sa drugim udruženjima i ostvarivati saradnju sa državnim i drugim organima i organizacijama koji rade ili koji mogu pomagati naučno-tehničko stvaralaštvo.

Udruženje je udruženo u Udruženje/Udrugu pedagoga tehničke kulture u Federaciji Bosne i Hercegovine radi unapređivanja i općeg razvoja tehničke kulture.

Čl. 2

Naziv udruženja je: **UDRUŽENJE/UDRUGA PEDAGOGA TEHNIČKE KULTURE U SREDNJOBOSANSKOM KANTONU/ŽUPANIJI SREDIŠNJA BOSNA** (u daljem tekstu: Udruženje/Udruga)

Sjedište Udruženja/Udruge je u Bugojnu- Jaklić 5 .

Područje na kojem se ostvaruje djelatnost Udruženja/Udruge je područje Srednjobosanskog kantona/Županije Središnja Bosna.

Udruženje/Udruga ima svojstvo pravnog lica, a stiče ga danom upisa u registar kod nadležnog ministarstva

Pečat Udruženja/Udruge je okruglog oblika prečnika 30 mm sa sljedećim tekstom oko njega: Udruženje/Udruga pedagoga tehničke kulture u Srednjobosanskom kantonu/Županiji Središnja Bosna, _____

Čl.3

Rad svih organa Udruženja/Udruge je javan.

II CILJEVI I ZADACI

Čl. 4

Osnovni ciljevi i zadaci Udruženja/Udruge su:

- saradnja sa odgojno-obrazovnim udruženjima, organizacijama i institucijama i drugim društvenim činiocima radi unapređivanja opće politike razvoja tehničke kulture i naučno-tehničkog stvaralaštva, posebno kod mladih;
- doprinos općem unapređivanju nastave tehničkog odgoja, a posebno inoviranje nastavnih planova i programa redovne nastave tehničkog odgoja;
- podsticanje, organiziranje i razvijanje vannastavnih tehničkih aktivnosti mladih; razvijanje interesovanja mladih za nauku i tehniku uopće, stvaranje općih uvjeta za bavljenje djelatnošću u cilju stjecanja naučno-tehničkih znanja i vještina , odnosno njihove primjene u životu i radu;
- neposredno i sa drugim subjektima, stručno osposobljavanje i usavršavanje nastavnika tehničkog odgoja;
- materijano obezbjeđivanje nastave tehničkog odgoja savremenim tehničkim sredstvima u cilju kvalitetnijeg izvođenja nastave
- otkrivanje nadarene djece i omladine za naučno-tehničko stvaralaštvo i stvaranje uvjeta za njihov dalji razvoj i profesionalnu orijentaciju;
- omasovljenje i jačanje postojećih i osnivanje novih oblika organiziranja pedagoga tehničkog odgoja u općinama.
- organiziranje stručnih seminara, smotri, takmičenja, savjetovanja, simpozijuma, organiziranje privredne, izdavačke, istraživačke i druge djelatnosti iz područja tehničke kulture i naučno-tehničkog stvaralaštva u skladu sa zakonom,
- u skladu sa međunarodnom politikom naše zemlje, ostvarivanje međunarodne saradnje sa organizacijama i organima iz drugih zemalja koji se bave naučno-tehničkim stvaralaštvom .

III UDRUŽIVANJE, PRAVA I DUŽNOSTI UDRUŽILACA

Čl. 5

Osnovu organiziranja u ostvarivanju ciljeva i zadataka , kao i udruživanja u Udruženje/Udrugu, čine dobrovoljno udruženi klubovi , aktivni, podružnice i drugi oblici organiziranja nastavnika tehničkog odgoja u općinama, pojedinci – nastavnici tehničkog odgoja, mentori u klubovima mladih tehničara, kao i drugi , u skladu sa odredbama ovog statuta

Udruživanje u Udruženje/Udrugu vrši se na način i po postupku koji se regulira normativnim aktima udružilaca i ovim statutom.

Istupanje iz Udruženja/Udruge vrši se na osnovi normativnih akata udružilaca ili na osnovi odluke skupštine Udruženja/Udruge u slučaju ozbiljnijeg kršenja ovog statuta od strane udružilaca.

Čl. 6

Općinski klubovi, aktivni, podružnice i drugi oblici organiziranja se osnivaju, organiziraju i rade u skladu sa važećim propisima nadležnih državnih organa područja na kojima djeluju i svojih normativnih akata.

Čl. 7

Prava i dužnosti udruženih članova su da u skladu sa ovim Statutom:

- prihvataju ovaj statut i pridržavaju se njegovih odredaba;
- biraju svoje predstavnike u organe Udruženja/Udruge;
- rade na ostvarivanju ciljeva i zadataka Udruženja/Udruge;
- daju inicijative, prijedloge i sugestije za aktivnosti svih organa Udruženja/Udruge;
- obezbjeđuju aktivno sudjelovanje svojih predstavnika u organima Udruženja/Udruge;
- budu pravovremeno i cjelovito informirani o radu i aktivnostima svih organa Udruženja/Udruge;
- Ostvaruju i druga prava i izvršavaju obaveze koje im proističu iz ovog Statuta.

IV ORGANI UDRUŽENJA/UDRUGE

Čl. 8

Organi Udruženja/Udruge su:

- Skupština,
- Upravni odbor i
- Nadzorni odbor

Čl. 9

Mandat zastupnika – članova u organima i tijelima Udruženja/Udruge traje četiri godine.

Mandat zastupnika može prestati i ranije u slučajevima opoziva od strane organa koji ga je delegirao , zatim isključenja od strane organa koji ga je izabrao, ostavke i smrti.

Čl. 10

Skupština:

Skupština Udruženja/Udruge je najviši organ Udruženja/Udruge.

Skupštinu Udruženja/Udruge čine predstavnici svih udruženih članova i određen broj pojedinaca iz općina u kojima nisu osnovani aktivni, podružnice i slično.

Kriterije kojima se određuje broj zastupnika u skupštini Udruženja/Udruge određuje Upravni odbor Udruženja/Udruge u skladu sa brojem članova udružilaca i nivom razvoja njihove aktivnosti na konkretnom području.

Skupština Udruženja/Udruge:

- donosi i mijenja statut Udruženja/Udruge i druga normativna akta;
- odlučuje o udruživanju u druga Udruženja/Udruge;
- verificuje članstvo - članove Udruženja/Udruge;
- donosi programska dokumenta Udruženja/Udruge;
- odlučuje o materijalno-finansijskom poslovanju Udruženja/Udruge; donosi finansijski plan i usvaja završni račun Udruženja/Udruge;
- razmatra i ocjenjuje rad svih organa i tijela Udruženja/Udruge; utvrđuje i razmatra pitanja od zajedničkog interesa za udružene članice i donosi zaključke i mjere za realiziranje zadataka Udruženja/Udruge;
- pokreće inicijative kod drugih organa, organizacija i zajednica za preduzimanje mjera u cilju razvoja i unapređivanja naučno-tehničke kulture mladih, nastave tehničkog odgoja i statusa nastavnika tehničkog odgoja;
- bira članove Upravnog odbora, predsjednika, potpredsjednike i sekretara Udruženja/Udruge;

- bira članove i predsjednika Nadzornog odbora
- donosi poslovnik o svom radu;
- donosi pravilnik o priznanjima, pohvalama i nagradama;
- proglašava počasne članove Udruženja/Udruge;
- donosi odluku o obavljanju privredne djelatnosti u skladu sa zakonom;
- odlučuje o prestanku rada Udruženja/Udruge;
- odlučuje i o drugim pitanjima za koja se proglasi nadležnom.

Čl. 11.

Redovna izborna skupština održava se svake četvrte godine. Prema potrebi skupština se može održavati i češće na osnovu zaključka Upravnog odbora ili na prijedlog najmanje tri udružena člana Udruženja/Udruge ili na zahtjev Nadzornog odbora.

Skupštinu zakazuje predsjednik

Prijedlog dnevnog reda i materijal za skupštinu dostavljaju se zastupnicima i drugim zainteresiranim najkasnije 15 dana prije održavanja skupštine.

Čl. 12

Skupština punovažno odlučuje ako joj prisustvuje više od polovine zastupnika.

Skupština donosi odluke većinom glasova prisutnih zastupnika.

Čl. 13

Upravni odbor:

Skupština bira Upravni odbor kao svoj izvršni organ.

Odluku o broju i sastavu članova Upravnog odbora donosi skupština.

Čl. 14

Upravni odbor priprema nacрте i prijedloge normativnih i drugih akata za skupštinu Udruženja/Udruge, brine se i obezbjeđuje provođenje odluka, programa rada, akata, zaključaka i preporuka skupštine Udruženja/Udruge; raspolaže imovinom Udruženja/Udruge na osnovi pozitivnih propisa i ovlaštenja skupštine; podnosi skupštini izvještaje o radu i finansijskom poslovanju;

Upravni odbor izvršava i druge zadatke koje mu u nadležnost stavi skupština.

Upravni odbor radi punovažno ako sjednici prisustvuje više od polovine članova.

Odluke Upravnog odbora donose se većinom glasova prisutnih.

Čl. 15.

Nadzorni odbor:

Skupština bira članove i predsjednika Nadzornog odbora. Broj i sastav članova Nadzornog odbora utvrđuje skupština Udruženja/Udruge.

Čl. 16

Nadzorni odbor vrši kontrolu, uvid i praćenje rada i primjene Statuta, prihvaćenih dogovora i drugih akata, te prati izvršavanje usvojenih stavova i odluka u oblasti materijalno-finansijskog poslovanja u skladu sa zakonom.

Nadzorni odbor podnosi izvještaj skupštini Udruženja/Udruge, a po potrebi i drugim nadležnim organima.

Čl. 17

U ostvarivanju svojih zadataka Nadzorni odbor surađuje sa Upravnim odborom Udruženja/Udruge radi upoznavanja sa stanjem izvršavanja odluka skupštine i primjene statuta i drugih akata Udruženja/Udruge.

Nadzorni odbor može, u slučaju težih povreda statuta i drugih akata, kao i nepravilnosti u rukovanju imovinom i sredstvima Udruženja/Udruge, zatražiti sazivanje skupštine Udruženja/Udruge.

Čl. 18.

Predsjednik:

Predsjednik:

- predstavlja i zastupa Udruženje/Udruge.,
- brine se i stara o provođenju odluka i zaključaka Skupštine i Upravnog odbora;
- ostvaruje saradnju sa drugim udruženjima, organima, organizacijama i institucijama,
- naredbodavac je za izvršenje finansijskog plana.

Za svoj rad predsjednik je odgovoran Skupštini i Upravnom odboru. Mandat predsjednika traje četiri godine.

Čl. 19

Potpredsjednik:

Potpredsjednik zamjenjuje predsjednika u njegovoj odsutnosti i u dogovoru sa predsjednikom obavlja i druge poslove.

Mandat potpredsjednika traje četiri godine.

Čl. 20**Sekretar:**

Sekretar Udruženja u dogovoru sa predsjednikom radi na pripremanju sjednica Upravnog odbora, skupštine i radnih tijela Udruženja i odgovoran je za provođenje odluka i zaključaka organa Udruženja. Uz predsjednika, naredbodavac je za izvršenje finansijskog plana.

Sekretar koordinira radom radnih tijela Upravnog odbora i obavlja i druge poslove koji proizlaze iz zaključaka organa Udruženja/Udruge. Sekretar je odgovoran Skupštini i Upravnom odboru.

Mandat sekretara traje četiri godine.

Čl. 21

Predsjednik, potpredsjednik i sekretar Udruženja/Udruge su istovremeno i predsjednik, potpredsjednik i sekretar Upravnog odbora Udruženja/Udruge.

V. STRUČNA SLUŽBA**Čl. 22**

U skladu sa pozitivnim propisima, Upravni odbor Udruženja/Udruge može osnovati službu za obavljanje stručnih, organizacionih, administracijskih, finansijskih i tehničkih poslova za potrebe Udruženja/Udruge ili te poslove povjeriti odgovarajućim službama drugih institucija, o čemu odluku donosi Upravni odbor.

Organizaciju službe i način njenog rada, uređuje Upravni odbor.

VI. FINANSIRANJE**Čl. 23**

Radi ostvarivanja svojih ciljeva i programskih zadataka, sredstva za finansiranje svoje aktivnosti Udruženje/Udruga ostvaruje - u skladu sa propisima – od prihoda sopstvene djelatnosti, članarine i doprinosa udruženih članova, dotacija državnih i drugih organa i organizacija, sponzorskih i donatorskih priloga, prihoda od privredne djelatnosti, kao i drugih prihoda.

Čl. 24

Sredstva Udruženja/Udruge mogu se trošiti samo za ostvarivanje funkcija i poslova utvrdjenih ovim Statutom ili poslova koji se kao takvi utvrde aktima organa Udruženja/Udruge.

VII. PRELAZNE I ZAVRŠNE ODREDBE

Čl. 25

Udruženje/Udruga prestaje sa radom kada to odluči Skupština dvotrećinskom kvalifikovanom većinom ili po sili zakona.

U slučaju prestanka rada Udruženja/Udruge, sva njena imovina prelazi u vlasništvo udruženja koje nastavi njegov rad. Ukoliko ne dođe do osnivanja takvog udruženja, imovina se stavlja na raspolaganje udruženim članicama.

Čl. 26

Izmjene i dopune statuta mogu predlagati Upravni odbor i Nadzorni odbor Udruženja/Udruge, kao i udružene članice.

Pravo obaveznog tumačenja statuta ima skupština Udruženja/Udruge, a između dvije skupštine Upravni odbor Udruženja/Udruge.

O pitanjima koja nisu regulisana ovim statutom odlučuje skupština Udruženja/Udruge, odnosno organ kojeg ovlasti skupština.

Čl. 27

Ovaj statut stupa na snagu danom donošenja.

Broj ;01/03
Travnik, 13.12.2003. godine

Predsjednik:
